



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Tatong Tir Dhankhar-i Manipur nung shisaliok tejutem semdang

Messi nem PSG-i hopta ana atema tenokdangba agütsü

VOL. XX NO. 201 (ADOK 201) DIMAPUR YANGTEPNÜ (THURSDAY)

MONUPII (MAY) 04, 2023

₹ 5.00

Oil & gas atsüteta magidaktsütsü: NSCN-IM

Dimapur, May 3, 2023 (TYO): Naga nunger aser India sorkar tsüingda yimten melatet tashi Naga lima nung natural oil & gas indang exploration asütsü memulungtsü ta NSCN-IM-i metetdaksüo.

Naga nungeri küm 70 tashi Tsüingremi agütsüba oil and natural gas reserves 600 million tonnes kümzüka aruogo aser 1963 küm state akümba sülen nungi sorkari iba nung tenük yoka arur. India sorkari Naga yimten tebilemsü süoki ia meblem tashi Naga nunger nem moatsüba rongsen magidaktsütsü, ta MIP, NSCN/GPRN sangdong ka nung ashi.

Küm 20 tejakdang NSCN-IM-i yimten melatet tashi Naga lima nung exploration &

extraction mesüdaktsütsü tetuyuba agütsüba nung masetshii noktaka lir, ta parnoki ashi.

August 3, 2015 nü sign asüba Framework Agreement nung Naga nunger putiotsü aser yimtenren temetentem lir saka India sorkari item atema süoki ia meblemba aser akhümsübu masüba mapang totzü ken o adokogo, ta NSCN-IM-isa metetdaksüo.

India sorkari Naga linük wako aser temzüng nung ammeter küm 25 tema Indo-Naga yimten ken o jembia arur. India sorkari Nagaland indang ali rongsen nung temulung agütsüba ama yimten latetsü atema temulung agütsütsüla, ta NSCN-IM-isa metetdaksüo.

Bobdar anogotem Treasury transaction days asütsü

Dimapur, May 3, 2023 (TYO): Bodbar anogotem Treasury transaction days asütsü ta Finance Department, Government of Nagaland-i

metetdaksüo. Iba ya mapang shitak nung payments aser receipts asütsü atema lir, ta Finance Department-isa ashi.

HC-i NSCN-IM lennir Alemla Jamir indang bail magizüker

New Delhi, May 3, 2023 (Agencies): NSCN-IM nung cabinet minister Alemla Jamir-i default bail meshiba Delhi High Court-i magizük.

NIA-i charge sheet peria magütsü ta shia Alemla-i bail meshi saka High Court-i ibaji magizük.

Mapang shia trial court-i Alemla apuba atema tetuyubatem agütsüba nung metokmeperi kecha mali. Anungji mapang telatet nung charge sheet ka agütsütetsü aser default bail magütsütsü ta High Court-i ashi.

"Alemla Jamir tepuokdak ayuba ya ozüng alema ta ashitsü makok kechiyong court clerk-i page numbering aser illegible documents dak sendakba nung mapang peria endokogo. NIA-ia ashishitep onük kar atema mapang agogo aser July 3, 2020 nü ashishitep ken o tem agienogo" ta Justice Siddharth Mridul aser Justice Talwant Singh na adenba bench-i ashi.

December 17, 2019 nü Delhi airport nung Alemla Jamir apuba sülen NIA-i la anema ken o benok. La Dimapur-i aotsü lia apu aser la ket nung Rs 72 lakh bona liasü.

Lai bona aliba senji kong nungi angur'ar lai meshitet aser Income Tax Department nem osang sangoktsüba sülen bushisüngdangtsü tenzük.

Alemla-i ketdangsurtem senji National Socialist Council of Nagaland (Isak-Muivah) meyong

liasü aser Muivah den yariteper ka ket nungi senji angu aser Dimapur nung Muivah nem agütsütsüba liasü ta ashi.

Iba osang ya Special Cell dangi yok aser Delhi Police-i FIR ka benok. Naga telungpur telok NSCN(IM) yariba atema parnoki FIR benok.

Muivah-i tetuyuba agüja Alemla indang air tickets renem ta NIA-i ashir.

Alemla kinungbo ya Muivah'er kinunger ka lir aser pa ya NSCN(IM) indang steering committee member aser taoba commander-in-chief liasü. India nung kiralongraba mapa inyaktsü atema senji amshi ta NIA-isa tai tongloktsü.

June 11, 2020 nü charge sheet agütsüba sülen trial court-i la apuba atema tetuyuba kecha magütsü ta Delhi High Court nung Alemla atema okatsüri ashi.

UAPA aser Arms Act kübok arlla balala nung la aser ano nisung ka tai tonglokja apuba sülen July 3, 2020 anogo tashi nung court file nung judicial remand shitak maliasü ta Alemla-i ashi.

"Bail order ka magütsü tashi undertrial ya tepuokdak ayutsüla aser Covid tenokdangbatem ajanga tai tonglokja alir special court-i anir moutet. Temaba ketdangsurtemi tetuyuba agütsüba ama duty metropolitan magistrate-i mapang shia la indang remand atsülangogo" ta Delhi High Court-i metetdaksü.

Nagaland sorkar school tekolaktem ita ka arangshitsü



Kohima, May 2, 2023 (TYO): Nagaland nung Government High Schools (GHS) aser Government Higher Secondary Schools (GHSS) tekolakpurtem atema School Leadership Development Programme (SLDP) ka tenzükogo.

Iba sentong ya May 2, 2023 nü SIEMAT Hall, SCERT nung tenzükogo aser May 31, 2023 tashi agütsü.

School Leadership Academy (SLA) SCERT, Nagaland tajungba akümsü nükjidong nung Nagaland Education Project - The Lighthouse (NECTAR) den yaritepa iba sentong ayonga agir.

Iba mapatong ajanga June 2023 tashi nung School Heads 150 tashi shilem asem lemsar

agütsü sentong lir.

Tanü Reader, SCERT, Kohima Benjung Yaden-i okila jembidang training programme indang tatsü agi lemsatetep.

Sentong nungsa Joint Director & Cell Head, State Assessment Cell, SIEMAT & SLA, SCERT Kohima Achetla Ao-i tesentepertem pelaa agizük aser iba sentong ya school tekolakpurtem professional skills tajungba akümsü atema lir ta ashi.

National Centre of School Leadership Academy-i 2016 küm iba asalentong yanglu aser January 10, 2016 nung Nagaland SLA tetet, ta Achetla Ao-i ashi.

"SLA-i tang tashi nung school tekolakpurtem atema 30 days

certification course sentong ana ayongzüka agiogo. SLDP atema anogo 18 sentong ka, school tekolakpurtem atema anogo 16 nü SLDP sentong ka aser nija school tekolakpurtem atema school leadership programme ka agiogo" ta Achetla-isa ashi.

Department of School Education (DoSE) Principal Director aser Nagaland Education Project (NEP) Project Director Thavaseelan-i Nagaland Education Project indang osang lemsatetep.

Lighthouse School Complexes dena mapatong aika inyakdar aser Performance Incentive Grant (PIG) repringdar ta Thavaseelan-isa ashi.

Manipur nung ILP akangshitsü atema Facial Recognition System tenzük

Imphal, May 3, 2023 (Agencies): Manipur nung Inner Line Permit (ILP) System takangba inyaktsü atema Facial Recognition System (FRS) tenzükogo.

Mongulbarnü Manipur chief minister N Biren-i ozüng alema arurtem putetsü atema camera-mounted mobile FRS vehicles ana sayatsü.

Facial Recognition Systems (FRS) ya Manipur-i Assam den arrtsü tatembangba Cachar district kübok Jiribam jila nung enokogo.

Maneni, Nagaland arrtsütepa aliba Mao jila nunga iba advanced technology mapa

tenzüktsü.

Jiribam jila nungsa camera-mounted Mobile Monitoring Vehicles amshitsü.

"Item inyakyim ajanga ozüng alema arurtem aser tangalen nungi legal documents melii Manipur telungi aitertem putetsü" ta Chief Minister N Biren Singh-i ashi.

Bangladesh, Nepal aser Myanmar nungi Inner Liner Permit Systems dena kulikaket shitak maliba foreign nationals Manipur-i aruba osangtem angazükogo, ta CM Biren-isa ashi.

FRS aser Camera mounted Mobile Monitoring Vehicles

ajanga Manipur tashi itdaksütsü aser ILP system akanga benshitetsü, ta paisa ashi.

State sorkari Manipur aser lisopurtem kümzüka ayutsü ta Biren Singh-isa nangzük.

Churachandpur district kübok Moreh aser Behiang aser ano Noneh district kübok Khongsang Railway station nunga FRSS enoktsü sentong lir, ta paisa shisem.

Tawa tu Imphal airport aser Imphal yimti nung Ima markets (women's market) dena nisungtem longsoba tesemtem nung FRSS enokogo ta CM Singh-isa ashi.

Nagaland-i Water resources indang CSS magiteter: Advisor Tongpang

Kohima, May 3, 2023 (TYO): Nagaland Central Ministry of Water Resources kübok Centrally Sponsored Scheme (CSS) magiteter aser scheme aika nungi ana dang inyaker ta Water Resources Advisor Tongpang Ozukum-i ashi.

"Nagaland nung scheme ana-Service Minor Irrigation Scheme aser Ground Water Irrigation dang inyaker aser iba ya rongsen maliba agi lir. Tanga scheme temji 50:50 funding pattern lir" ta pai ashi.

"Nagaland dang masü saka tanga North East State temia item scheme magitetsü. Anungji Union Minister for Water Resource, Gajendra Singh Shekhawat dang Nagaland aser

tanga NE state tem atema funding pattern melenshitsü mepishiogo" ta Advisor Tongpang-i ashi.

May 1 nü Guwahati nung Brahmaputra Board indang 12th High Powered Review Board Meeting nung iba temepishiba agütsüo ta paisa shisem.

Iba senden nung Chief Minister Neiphiu Rio tenüng nung Advisor Tongpang aden. Brahmaputra Board nung Neiphiu Rio züngsema lir.

Common Area Development & Water Management amala CSS schemes nung Centre aser state tsüingda 50:50 funding pattern lir aser iba ya Nagaland ama senotsü peria manguba state atema tamakoktsü, ta Advisor-isa

metetdaksü.

Nagaland nung water bodies 1432 shi lir saka teimba kongadoker anungji water bodies anepalutsü nüngdaker. Külen, Nagaland nung ayong aika lir saka ayong tulu 15 dang lir aser kümshia ali anenzüka aoba ajanga ayongtem tuluba akümer, ta pai ashi.

Water Resource Ministry-i state based projects agizüktsü aser taküm financial year nung tüzümsüng aser ali anenzüka aoba nung temulung agütsütsü mepishiogo, ta Tongpang-isa ashi.

Union Minister Shekhawat-i item teblembe mulunga agizükogo aser state sorkar dang tekaraba nung proposal agütsütsü shiogo ta paisa shisem.



Ao Senden-i ayongba Moatsü mungzük sentong May 3 nü yangi Aor Kilem Mokokchung nung akaba mapang sentong nung adenenerkem külemi tangokba noksa nung angur. Iba sentong nung Mokokchung DC, Shashank Pratap Singh IAS, Mokokchung SP, Manoj Kumar IPS, Ao Senden tir, Chubawati-i anir par külem tenzükertem den Watsü Mungdang, Ao Kaketshir Mungdang, Aoli Dobashi, All Ward Union Mokokchung Town, Mokokchung Press Club item lokti tentet balala nungi ketdangsürtem arua shilem agia aden. State sorkar den külem sür Ao Senden-i ayonga May 1-3 tashi Mokokchung nung Moatsü benjong takok manung kaogo.

STI, HIV, TB & Hepatitis tashidak tendangtsü asoshi renemshir

Dimapur, Monupii/May 03 (TYO): Integrated STI, HIV, TB, Hepatitis (ISHTH) Campaign in Prisons & Other Closed Settings (P&OCS) indang State Oversight Committee (SOC) senden ka May 2, 2023 nü Conference Hall, Directorate of Health & Family Welfare, Kohima nung mena liasü.

Iba senden ya Y. KikhetoSema, IAS, Commissioner & Secretary to the Govt. of Nagaland & Chairman, NSACS menden sür agia liasü.

Iba senden nung Dr. Bernice D Thapru, Joint Director (Prevention), NSACS ajanga aruya aliba campaign atema

maparen aser sentong balala lemsatep aser Medo Kire, Dy. Director (SIMU), NSACS ajanga state nung HIV & AIDS tensa indang lemsatepa liasü.

ISHTH campaign agitsü aliba yimyatem jembitsü atema iba SOC senden ya amen, koba state ajunga nung district ajak nung tepuokdak alirtem aser shibanga alirtem dak STI, HIV, TB & Hepatitis tendangtsü sentong ka lir.

Iba SOC senden nung Principal Director, H&FW, Dr. Vibeitunuo M. Sachu; Mission Director NHM, Dr. Ritu Thurr; Project Director NSACS, Dr. Akuo Sorhie; State TB Officer, Dr. Tiasunep; Health & Family

Welfare nungi ketdangsürtem, Social Welfare Department, Prison Department, Development partners, NGO partners nungi teshimtet nisungtem dena liasü.

ISHTH campaign ya linük tesem ajunga nung National AIDS Control Organisation tawabangba kübok May 15, 2023 nung tenzüksü lir.

Iba senden nung ano aruya aliba Integrated Health Camp (IHC) aser Elimination of Vertical Transmission of HIV & Syphilis (EVTHS) campaign indanga benoka jemi aser Dr. M. Nukshisangla Jamir, Deputy Director (BSD), NSACS ajanga presentation agüja liasü.

NSCN-IM lenir ka kidang nungi taila sen ngutet

Dimapur, Monupii/May 03 (TYO): Assam Rifles temi Bamunpukhari Village nung NSCN (IM) lenir SS Major Athong Sangtham bushia 'follow up operation' ka agia liasü.

April 28, 2023 nü apuba NSCN (IM) lenir pongu den asüngdangyaba mapang pa

tenüng temai adoka liasü, ta sangdong ka ajanga ashi.

SS Major Athong yabo kidang nungi jena ao saka par kidang nungi sen 40,000, taila sen 500 note 87, Radio set den charger ka, Smart Phones ana, Basic Mobile ka, Air Gun Rifle den scope (number maket) ka, NSCN nisan ana, NSCN-IM

documents aser Maruti Alto 800 (NL 07 CV 9198) ka nguteta liasü.

Pua aliba cadres tem den asüngdangyaba mapang temai adoksang nisungba aputsü operation tagidak lir aser par kidang ngutetba osettem police nem agütsüogo, ta sangdong ajanga ashi.

CALT puri lokti nübuttsük mapa inyak



Dimapur, Monupii/May 03 (TYO): Moatsü tenüng nung Chumukedima Ao Lanur Telongjem (CALT) ajanga Chumoukedima DC Complex nung May 3, 2023 nü lokti nübuttsük ayongzüka anepdang 6:00 ako nungi mapa inyaka liasü.

Deputy Commissioner, Chumoukedima nungi temelaba agir ayongzükba nübuttsük sentong nung Chumukedima Town nung alir Aor lanur 150 shi arua shilem agia liasü.

Iba mapang parnoki DC Complex gate mezüngbuba nungi DC Office Gate tashi

lenmang, gari anena ayuba tesem aser Office Complex temeket arem müreka liasü.

Iba anogomung nüngtem nung CALT züngsem temi DC Complex meketa süngdong-lidong tema liasü.

Kin balalai iba ama benjongmung mapang pelatepa aser sentong balala ayongzüka amunger, saka Chumoukedima nung aliba Aor lanur temi iba ama sentong ayongzükba ya mezüngbuba alitsü aser tarutsü nung kin balalai iba ama mapa inyaksü imlar.

Deputy Commissioner ajanga pa indang Office

Complex nung iba mapa inyaksü asoshi temelaba agütsüba atema pelar, ta Chumukedima Ao Lanur Telongjem ajanga ashi.

Maneni iba mapa inyakba mapang Temsuchuba, SDO (C) Chumukedima ajanga süngojemtsü agütsüba, S.Bendangmongba Imsong Ranger, Dimapur Division, Rangapahar Range ajanga süngdong agütsüba, Chumoukedima Ao Senso Telongjem aser Aor tebu teti temi lenmang balala nung yariba atema pelaba lemsateper, ta ashi.

IRCS Nagaland branch pur World Red Cross Day amungtsü

Dimapur, Monupii/May 03 (TYO): Indian Red Cross Society, Nagaland State Branch pur May 8, 2023 nü "Everything we do comes #from the Heart" omen nung ajemdaker World Red Cross Day amungtsü.

Iba anogomung nüngtem nung Junior/Youth Red Cross Student ajanga Kohima Town nung May 6, 2023 nü sen

lenmang bushia Red Cross token lemtsüba/khaloktsüba mapa inyaksü.

Anungji iba sentong nung Red Cross Patron/Vice-Patron züngsemtem, Life Members aser nüburtemi temeim sayua tenlatsü ayongzüker, ta Indian Red Cross Society, Nagaland State Branch sangdong ka ajanga ashi.

Dimapur Police-i gari auyar pezü apu



Dimapur, Monupii/May 03 (TYO): Suburban Police Station Team ajanga Phimla village council teyari nung gari auyar nisung pezü May 1, 2023 nü pua liasü.

Sangdong ka ajanga ashiba agi, parnoki auyaba bike asem Super Splendor ka, Xpulse 200 B/R No. NL 07EA 7555 ka aser Xpulse B/R No. NLO7EB 5953 ka den ano parnoki iba mapa tamajung inyakdang amshiba Alto 800 B/R No. ASI2P 1424 gari ka parnok ket nungi nguteta liasü.

Pua aliba nisungtem den gari tem ya Police Station-i bener aru

aser ozüng agi melaba maparen ajak inyaka parnok police ket nung lir.

Iba dak sendakba nung tapet ozüng kübok ken o ka benoka bushisüngdang tenzükogo, ta sangdong ajanga ashi.

Pua alirtem ya Vito Awomi (37 yrs) S/o Latovi Awomi, R/o Pimla Village; SS Rajupio Tokato Awomi (29 yrs) NSCN-IM, S/o Vihokhe Awomi, R/o Pimla Village; Kitoka Awomi (35 yrs) S/o Kashaver Awomi, R/o Pimla Village aser Kughashe Swu (30 yrs), S/o Khahexu Swu, R/o Pimla Village alitsü.

CMHSS, Impur nung Moatsü amung



Clark Memorial Higher Secondary School, Impur nung Moatsü sentong akadang ABAM Development Promoter Rev.S.Moa Aier-ijembir aser tanurtem shilem agiba noksa nung angur.

Impur, Monupii/May 3(TYO):Tanu Clark Memorial Higher Secondary School,(CMHSS) Impur nung Moatsü mungogo.

CMHSS nung tanu Moatsü benjong nüngtem nung Cultural Day cum Moatsü Südüngünem sentong kaogo. Iba sentong nung tanurtem telok balala lemsar Nülaksü, Yimdong kazür ken, Jayajako, Maotsü ratet jilushi,Moatsü ken aser sobaliba sübotsü ratet shitepba nungtem nung tetoktepba agia liasü.

Tanu iba sentong nung ABAM Development Promoter Rev.S.Moa Aier ajanga "Kechiba Moatsü" ta süba onük nung ajemdaker lanurtem dang pei sobaliba meteta alitsü

tim aser pei sobaliba tajungtem angazüka benshitsuälata ayongzüka ashi.

Tetoktepba balala agiba nung Wb.L.Sanen Impur Bible School,Kr.Akokra CMHSS aser Wb.Tialiba CMHSS nung tetendanger liasü aser tetoktepba balala nung shilem agirtem nem sempet tajung aguja benjongtep.

CMHSS nung tanu iba Moatsü sentong nung tesayur aser kaketshirtem ajak pei sobaliba sübor aden aser ibaji ajanga sentong kanga dang meraketa amungba den pei medemsortem nungi aser sentong agiba nungi tangazükba tulu ngua iba sentong takokma nung agia tembang.

Madhya Pradesh nung doctor 13,000-i longkak ait tenzükogo Bhopal, May 03 (Agencies): Bodhbar nungi tenzuka Madhya Pradesh nung aliba sorkar hospital tem nungi doctor temi anogo kecha telatet makai longkak ait tenzükogo.

Doctor temi yimtsüngtem nung posting lezmükja aliba doctor tem nem facilities tajung agütsüsüla aser parnok maparen nung ketdangsertem tiyongtsüi maidaktsüsüla, ta akhanger.

Medical associations balalai tentetba Madhya Pradesh Shaskiya Swashasi Chikitsak Mahasangh -i sorkar den aiben senden mena tebilemtsü onük jembu, ajisüaka telemtetba kecha magitetba agi parnoki longkak aiter.

Doctor 13,000 jungnüai longkak aitba nung shilem agidar. Taküm February ita nunga state nung doctor temi longkak aita liasü. Doctor temi longkak aitba ajanga out patient tem kanga timtemtsü aser hospital maparen balala nung tamakok angutsüa akok.

Mongolbar aonung Madhya Pradesh Chief Minister, Shivraj Chouhan-i district collectors aser divisional commissioners den senden mena liasü aser parnok dang doctor tem longkak aitba mapang nung state nung medical facilities tsütsü tamakok malutsü tuyua liasü.

Senden tembangba sülen Chouhan-i sangdong ka ajanga, "Health services ya nungdakba

services lir, anungji item ama service nung tetsükdaksü malitsüla. Longkak aitba ya tim masü. Medical colleges aser hospitals nungi PG doctor tem service agitsüla," ta metetdaksü.

Chief Minister-isa ketdangsertem dang nija hospital tem teyari agiang, ta tuyuba den külemi Ayushman Yojana scheme kübok shirangertem nija hospital tem nung yaritsü, ta metetdaksü. "Doctor tem ya Tsüngrem ama züngshir, kechiyong parnoki takümtem kümzükter, anungji meimchir taküm den masayatsüla," ta pai ashi.

Bhopal district nungbo administration-i nija hospital tem nungi doctor jaoka sorkar hospital tem nung inyakkdaksü tenzükogo.

Bodhbarnü osangbenertem den jembidang Bhopal Collector, Ashish Singh-i, "State yimtiba nung aliba sorkar hospital tulutüba Hamidia Hospital nung yariteptsü atema nija hospitals nungi doctor 150 jaokogo aser parnoki outpatient department (OPD) aser wards nung shirangertem yaridar," ta metetdaksü.

Madhya Pradesh Shaskiya Swashasi Chikitsak Mahasangh nung lenir kati, "Minister aser chief minister-i onoki akhangba agizüktsü, ta nangzükba agi onoki longkak aitba February 17 nü anena liasü, ajisüaka onoki akhangba mataloktsü," ta metetdaksü.



May 03, 2023 nü Karnataka kübok Hubballi nung osangbenertem senden ka nung Rajasthan Chief Minister Ashok Gehlot aser Congress lenir, Jagadish Shettar nati jembidang tangokba noksa nung angur.

Kasa kiyimba onük asadangtsü atema luden ka tentettsü: Centre

New Delhi, May 03 (Agencies): Bodhbarnü Centre sorkari Supreme Court dang, kasa kiyimba dak sendakba nung administrative mera balala asadangtsü atema cabinet secretary leniba nung committee ka tentettsü, ta metetdaksü.

Centre tenung nung jembir Solicitor General, Tushar Mehta-i Chief Justice D Y Chandrachud-i aniba judge pongui akümbe constitution bench dang, kasa kiyimba onük nung administrative tsütsülen nungi tebilemba onük balala benokner, ta metetdaksü.

Iba bench nung züngsem pezüji justices- S K Kaul, S R Bhat, Hima Kohli aser P S Narasimha nung lir. Mehta-i, iba atema ministry ka dak tali tsüngda amaliteptsü nungdaker, ta ashi.

Kasa kiyimtsü atema mepishiba ken otem anogo tenetnübuba angadanga mapang nung Mehta-i, temepishiba ken o agütsürtemia iba dak sendakba onük nung

administrative mera balala agitsü atema tebilemba lemsateptsü akok, ta ashi.

April 27 nü iba ken o angadanga mapang nung Supreme Court-i Centre dang, kasa kiyimba memelayonga parnok ama kasa meimtepertem (same-sex couples) nem sorkar welfare scheme balala nungi tajangzük agütsüsü akok asü, ta asüngdanga liasü.

Taoba Bodhbarnü Centre-i Supreme Court dang, linük nung kasa kiyimtsü (tetsür o tetsür na mesüra tebur o tebur na kiyimtsü) atema mepishiba onük ya Parliament nem agütsüsüla, ta metetdakja liasü. Mehta-i SC dang, iba onük ka kanga tebenja aser loktiliba nung mejungi kongshitsüsa aliba onük ka lir, ta shia iba onük ya Parliament nem agütsüsü mepishi.

Iba onük ya ajanga loktiliba nung lenla aika nung kongshitsüsa lir, anungji iba onük atema loktiliba nung aser state legislatures nung tama o toktepa jembitsüla, ta pai metetdakja liasü.



May 03, 2023 nü Dakshina Kannada district nung Karnataka assembly election atema nüboyimba sentong ka nung Ato kilonser, Narendra Modi-i party pusemertem dak teka ayiploksüba noksa nung angur.

World Press Freedom Index nung India jenjang 11 ajema luogo

New Delhi, Monupii/May 03 (Agencies): World Press Freedom Index 2023 nung India ano jenjang 11 ajema lua jenjang 161buba akümbe atema linük nung Media associations-i tebilemtsü akaba lemsatepogo.

World Press Freedom Index 2023 report ya Bodhbarnü saya.

Küm shia Global media watchdog Reporters Without Borders (RSF)-i küm shia linük balala nung osangbenertem sademsadema inyaktetba jenjang asadanga report agütsür. Yaküm linük 180 nungi India jenjang 150buba nung liasü saka takümbo jenjang 161buba kümogo.

RSF report ajanga, "Iba tensa ya linük asem nung kanga

mejungi kümogo: Tajikistan (jenjang ka ajema 153buba aküm), India (jenjang 11 ajema 161buba aküm) aser Turkey (jenjang 16 ajema 165buba aküm)," ta metetdaksü.

"O s a n g t s ü s a n g sademsadema prokba nokdangbaji yimtenren lenirtem den tesendaktep alir telok balala ajanga lir," ta World Press Freedom Day nü RSF report ajanga metetdaksü.

Iba report sangdongba sülen Indian Women's Press Corps, Press Club of India aser Press Association-i külem sangdong ka ajanga India nung World Press Freedom jenjang ano tamajungba akümbe atema aitsü. "RSF report ajanga ashiba

agi, India densema linük aika nung press freedom ano tamajungba kümogo," ta külem sangdong nung shia lir.

"Global South nung terenlokdak democracy linüktem nung temeden junga mali aser osangbenertem teinyaktsü shilem nüburtemi mangateter," ta sangdong nung shia lir.

RSF report dak sendakba nung Congress lenir aser MP, Shashi Tharoor-ia twitter ajanga, "Asenok ajak aaktsü mapang tongogo; World Press Freedom Index nung India jenjang ano tamajungba kümogo, linük 180 nungi jenjang 161buba nung ang lir," ta metetdaksü.

'Operation Kaveri' kübok ano India nung 231 anir aruogo

Jeddah/Mumbai, May 03 (Agencies): India nung 'Operation Kaveri' kübok Bodhbarnü tayimtsü 12buba nung India nung 231 Jeddah yimti nungi anir arua Mumbai tongogo.

Rara adoka aliba Sudan nungi parnok Jeddah yimti (Saudi Arabia) nung mezüng aniteta liasü.

Bodhbarnü External affairs ministry otongdar, Arindam Bagchi-i twitter ajanga, "Tayimtsü 12buba Jeddah nungi apusoogo. Passenger 231 Mumbai-i arudar," ta metetdakja

liasü. Mongolbar aonunga India nung 328 Sudan nungi anir arua New Delhi International Airport nung anenzüka liasü.

Operation Kaveri kübok tang tashi nung India nung 3,000 jungnüa anir aruogo.

Mongolbar aonung external affairs minister, S Jaishankar-i twitter ajanga, "Ano passenger 328 New Delhi tonga aruogo. #OperationKaveri kübok tang tashi nung India nung 3,000 shi anir aruogo," ta metetdakja liasü.

India nung shinga Sudan

nung anüngzuka meyutsütsü, ta sorkari telemtetba agia April 24 nü 'Operation Kaveri' tenzuka IAF tayimtsütem aser raraba rong balala nungi India nung anir arur.

Mongolbar anepdanga tayimtsü ka nung India nung 231 anir arua Ahmedabad yimti tongogo, ta Jaishankar-i metetdaksü.

Taoba Amongnü external affairs minister (EAM) S Jaishankar-i, Amongnü tashi nung India nung 2,300 jungnüa anir aruogo, ta metetdakja liasü.



May 03, 2023 nü Chennai nung aliba Apollo Proton Cancer Centre nung MP, Kanimozhi Karunanidhi aser Apollo Hospitals Vice Chairperson, Preetha Reddy nati RadiXactX9 Helical Tomotherapy semzüktsüba sülen tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII (MAY) 04, 2023

Benjongmong nung temelenshi

Tsürabur kari ashiba agibo, akhi mapang otsüla oboula nungertem moatsü amongba ya tepela benjongbo tulu saka anempong aser tashibang kecha mali among, anungji aiür asangurtem dang masü saka kijung purtema shi nung mezüpelanga japujariba benjong amato ka liasü. Atangji, asenoki asenoksasa asen kin ya ochishir aser tasüngtet ta jembiaka, iba ama benjongbentsü amongba aser taküm libaliru kar nungbo kanga tasüngtet takümtembo masütsü amai asenoki asadangtetter. Ashiko, alu chidang nungi alu tenma tashi alu mapa ajak nung anemponga aruba agi moatsü benjong yabo shi azü ajak salaa chiokba mapang ka ama pelatep südi ta bilemer. Ajisüaka, tanübo asenoki moatsü ya Yisu tenüng nung sarasadema kanga merüka amongtsü merangba angur. Asenok lipok aser sobaliba ayak mesamadaktsü asenoki akhi tsüraburtemi monga aruba tongtibang benjongtembo amonger saka tsüraburtemi amongba yimya nung masü saka merükteter amongba ya asen sobaliba nung asenoki temelenshi tajung ka bener arutetba takok aser temoatsü asütsü. Atangji, tsürabur mapang moatsü nung yi jemtepa kecha tashibang melii kazütepbaaji parnokoki külemba tsüngrem tsüngdang tai masü amato bilema inyaka alitsü akok, ajisüaka parnok dak tajung kaji benjong amongba ajakji tsüngrem tashi aser ain angateta amongba benjongtem liasü. Ibayongji Tsüngremi aochi südi aser item tsürabur semchir semnurtemji tanü asenok lir. Atangji, asenoka meilongi-meilongi tangatetba-tangatetba akümer asünungji benjong nung sübuba süoshi, yartsüngsang aser chiyongtsü ajak tajungba-tajungba küma melenshiba angur. Item temelenshitem den külemi asenok chirnurtemia asenok tsüraburtem jilu ajizüka benjongbentsü sobaliba tajung ajizüka benshia aotsü atema Moatsü aser Tsübgremmong benjong ya kin, tzükong mesüra yim rangben tesem ka nung adenshia amongba den külemi ano asenok kibong shia nung amongtsüla. Atangji, tanü asüngbo aika kibong nung anogo shia shi ango den dang chiyonga alitsüa akok, ajisüaka benjong tenüng nung pei pei kibong yari shi balaka awazüa benjong monga kinungertem rongnung moatsü aser tsüngremmong indang jembiak külemi chiyongtepra, iba jagi kinungertem teputepba aser Tsüngrem temeima tali temetetba akümtsü. Ano, tanü asüng asenok sobaliba benjong amongba nung tajung kaji asen benjong nung külemi pelateptsü asoshi asenoki tangar dena jaoka amonger. Iba jagi benjong amongba tajangzük asenok rongnung temeim akangshiba dang masü saka benjong ajanga tangar den tesendaktep tajung yanglur. Iba ama temelenshi tajung benshiba sobaliba nung ano tali tangatetba asütsü atema kodangsa asenoki asen sentong nung adentsü asoshi tongti tesemdang mesüra tongti tejaoker ta tetushi jenjang ka agütsür jaokdir, pa mesüra laji asenok rongnung züngsemba nübo ka masütsüla, kechiyong paji mesüra laji 'guest', tangar mesüra aiener. Iba tetezü aser nükjidongji kodang asenoki angateta benshidir, asenok benjong ayongertembo 'host', kibur aser tejaoker asütsü. Ajisa tazüba aser shitakba asütsü. Aji oda, asenok sentong nung asenok rongnung ka tejaoker südaktsüba sobaliba ya melenshi nung ajungtsü. Iba denji Moatsü aser Tsüngremmong ama nungbo tepela aser tayongzükba o tatsütsü jembiak yartsüngsang aser kentenmenüba aser chiyongba nungang mapang endoktsüla. Atangji, benjong ratet ashibajia junger. Item dakji alaka tensa tia majungba aser nübortem meshitakba indang jembiak agi benjong nung mulung saladakja pelateptsü melen benjongmunger mulung menendaktsür. Alima nung teti tebilemtsü aser tezüdangtsübosala alitsü, ajisüaka item ajakji mali ama amadoker küm nung khen anabenka benjong amongba ya pelatepa amungtsüsa ken a tenra aser o a jembiak, atangji, benjong shizüka amungtsü.

OLEMSABANG

TZÜMAR MATSÜNGDANG ASENOK YA OKORA LIASÜ

~ T. Meren Paul, Kohima

(Yashi adok nungi...)

Birtish nung 1830 sülen arudang asenok ya kesa talidak ya kesa 13 century jenjang nung Ahom nung arudang aliba amajisa terenlok kecha mali kusa thia nungjisa liasü. 1885 nung Inner Line yanglua doktsü aser 1901 aser 1913 nung iba Inner Line artsümelenshia Reserve Forest asazüka yanglu tashi asenok kusa thia nung liasü. British nung India-iaruba ya shishilembatsü aser rongsen bushia tajangzük tulu angutsü asoshi aru aser Assam nung süngolu ayimtsü tenzük. Asen Naga nung yimmakerdemi süngolu inyaker tekolak lepzüka bener aoba ajanga British nung Naga lima-i asenok meresnshitsü aru. Angami nung nungribo, talisa Khonoma nungri Birtish nung den pei lima kümzüktsü asoshi tongpang rara, ajioda süaka British nungri ken anaben nokdangtetaka parnok tashi den raratsü tamakoktsü liasü aser aji oda British nungri Angami lima nungpoka yiaki Kohima nung amenokdang asen Ao limabo ano medongi liasü. British yimsüsüba dang tama asen thia junga Dr. Clark shiba China mission asoshi America nung Sibsagar nung arua amenoker liasü, pa den Tsüngrem tejembiba ajanga Tekümtet Osangtajung Mulung lima donga bener atu. Iba sülenjiang British nung Ao limai arua Mokokchung nung Sangtamla tekong mesemtet.

Asen Aor kanga thia ka-a asenok kakat zülu sayutsü tenzükdangbo asen limai arua asenok tenzüktsü arur rongnung nisung asem tashi agi asen Aor jenjang tera tashi lua bushiteta asen sobaliba aser yimden yimsüsübaren ajak bushia kakat nung zülua doktsü. Mezüngpubaji America nung Sociologist William C. Smith shiba Impur-i Missionary ka ama aru aser Impur Mission School nung azüngtsü asoshi kakat Ao oshi nung meyipzüka menüngba mapa inyaka, pai "THE AO-NAGA TRIBE OF ASSAM" zülu. Tanapubaji Hindu nung Dr. Surendra Nath Majumdar Mokokchung Hospital nung arua Medical Officer inyaka aser pai "AO NAGAS" ta ser kakatnu ka February 17, 1925 nung zülu. Iba sülenji tasempuba British nung Mokokchung SDO Civil, J.P. Mills shiba Anthropologist ka liasü pai kanga tabensaba nung "THE AO NAGAS" kakat zülu. Item kakat asemprongla nung parnok anguba, ajangshiba aser angatetba asen Aor indang zülu anungji kakat asem ajangaji asenoki asen süiren rasaralem palala ngujemtsü

Asenok ajaki angashia aliba asen tsürapur otsüren 1940 tashi tapu ka asütsü südi, tsüngküm aru ataa alitsü aser tzümaleni shiruru tasü mang bushi alutsü aser shiruru tasü mangji sensaha alangsaer mi nung aor bener atuba otsü lir. Teburi palaka tzü mejikodang aser temang nungi arü rukang akangbaji pasasah jakzüka aoba dak alaka tzü jikotsüji yimya dak maketbamapa liasü. Saka tetsürtemibo aiben tzü jiko aser temang meraka ali ta Dr. S. N. Majumdar kakat nung angur. Yamaji süoshi magi merükmeju maket nung shiruru tasü mang bushia achiba nisung dang Okora ta ajabaji asen mapa den apet ajaba liasü. Tanübo asenoki Assamese nung aki tejen ken nung Naga nung Okora aser Nagini ta Bihu dance nung atenba angashia asenok ara aita awaker. NBCC-i Omen amshiba "Darkness to Light" asenoki ajangshia aruba ochi kuli aseni jembiak sünung hau ta bo magizükteba shisatsü adoker. Aya! Tsüngrem nai onok iba Okora thia nungi ya tashi anitet ta Tsüngrem tenüng asangtsü apitet nung koda jungla. Assamese nungri April 13 Bihu yadi nü meshisadangi tanü putu den mapetba akh tejen ken amshiba ji par shisatsü agi ojang atong ta kanga nemjema bilemer aser ibaji kanga majung, saka ken ji tanü asentenshia adenyonga madenyonga tejen otsüjibo asenoki maidoktet. Asenok Okora ta ajaba tejen otsüka ni tanur asüdang angazükba bilemteter. Asen Aor chanu ka Tzümalen lua Tzümar ka kidang killia ali. Kenü anogo tanubusangji anir kibubaji arem kati süng alentsü ao aser aremji tonger külen mapa tenzükdi ta apusu nung tenadi süng alentsüpu (axe) amadoker maben ao asü. Tanubosang jagi Assamese oshi mashi, tena tekabo ayipa dang jembiak aser pu ji tekabu agi rasaa mesayutet nungji Tzümarsangjangi lungpak tila ka shia arur yangji mijang agi pu bener yokang ta zülur pa kinungtsü dangi kidangi yok. Tanubusangji ki donger kibutsü nemji iba lungpakji agutsü, lai aji agizüker reprang aser kimaji merepdok aser kidangi kaoerpu agizüka bener alur tanubusang nemji agutsü. Tanubusangi pu ji amer arem jagi ao aser aonung kidangi adoker külen kima endoka aliba lungpakji shia arua pai talangka meimshia ibaji ayu. Pa zülu memetet anungji pai lungpak nungji ain keta lir aser o jembiak ta bilem. Yamaji asenok dangji Okora ta aja.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Franklin Graham-i Maryland nung 'God Loves You' tour tenzükogo



April 29, 2023 nü La Plata, Maryland nung God Loves You Tidewater Tour agidang tangokba noksa nung angur. Honibar aonung nisung noklang aikati Khrista agizüka liasü.

Monupii/May 03, 2023: April 29, 2023 nü nungtugu sayutsüingir, Franklin Graham-i La Plata, Maryland nung "God Loves You" Tidewater Tour tenzükogo.

Osangbener den jembidang pai, "Osangtajung lir, ta nisungtem nem nenshia metetdaksütsü atema onok arutsü. Tsüngremi asenok meimer aser asenok temenen nungi kümzüksü atema Pai Pa chir Yisu Khrista alimai yok," ta metetdakja liasü.

Graham-isa Virginia aser North Carolina nunga item sentong ayongzükä agitsü aser item sentong nung Newsboys, Marcos Witt aser Dennis Agajanian nungeri ken atentsü.

Billy Graham Evangelistic Association (BGEA) Tir aser CEO, Franklin Graham-i, "Tzüyimkümlen aliba tesem ya kanga junger aser iba tesem puti otsü takar, ajisüaka asen linük tesem aika nung Tsüngrem memeteter aika aliba ama iba tesem nunga Tsüngrem memeteterem lir. Nisung aikati telangzüba bushir aser timtemer. Tsüngremi parnok

meimer aser taküm nung sentong renemja lir ta ni parnok den lemsatepner," ta ashi.

"Alima ya kanga keraa melenshidar-chiyungtsü jenjang kanga atur, bank tamakok, ozüing alema inyakba mapatem kanga bulua akümer, Ukraine nung rara lir, yamaji mezüingdangtetba timtem aika lir. Nisung aikati pei tarutsü tia atema tsübur aser kechi inyaksüar memetet," ta pai metetdaksü.

Tidewater region nung rangloker iba tour atema BGEA-i Arogo 700 shi den partner yangluogo.

Waldorf, Maryland nung aliba St. Charles Arogo nung senior pastor, Fred Caudle-i, "Nisungtemi, Tsüngremi parnok meimer, ta asüba osangtajung angatsü nungdaker. Southern Maryland ya kanga keraa ainba region ka lir. Tang iba region nung loktiliba, rongsenkettsüing sobaliba aser yimtenren dak sendakba timtem aika lir. God Loves You Tour ya mapang tetemsü ka nung agir," ta

metetdaksü.

"Nisungtemi taküm nung tetezü, yimjung aser ochi bushir. Tsüngremi na meimer aser Pa temeimji Khrista Kangki nung asüba ajanga sayur, koba ajanga teraksa lima nem teimla aser taneptsüba agütsür," ta paisa ashi.

Yaküm Graham-i 2022 God Love You Tour, Minnesota nung tembanga liasü. Yaküm yimti 6 nung iba tour nung nisung 50,000 dak tema aden.

'God Loves You Tour' ya September ita tatembanglen Allentown, Pennsylvania nung tenzükä liasü aser October 2, 2022 nü Rochester, Minnesota nung tembanga liasü.

Yaküma iba tour atema yimti trok nung Arogo 970-i BGEA den yaritepa liasü.

Yaküm UK nunga God Loves You Tour May ita nung tenzük aser July ita nung tembanga liasü. Item sentong nung CeCe Winans aser Michael W. Smith nungeri ken tena liasü. UK nung aliba "God Loves You" tour nung nisung 1,400 dak temai Yisu Khrista agizüka liasü.

ANOGO ABEN TSÜNGREM DEN

Ali aser alizüing

(T.Ken 103: 13-18)

Aseni teti amadokba asen Tsüngremi teti bilemtetter. Ken Pai asenoki bilemtetdaksünüba asenoki amadoker, aser asenok timtemi aier. Na kechi agi yanglu nai menur bilemtet asü? "Tebui pei chirtem dang aochiba ama, yamaji Kibubai pa tsübubatem dang aochir. Kechiyong asen kechi agi yanglu pai metetter; asenok ali dang ta bilemtetter" (t.13,14). Tsüngremi ali agi Adam dak taküm tangula apuoktsü, aser Pa akümlir ka aküm. Asenok temang ali nungi yanglu. Saka asenok dak Tsüngrem noksa lir, kechiyong asenok Pa mesükba nung yanglu.

Kodang asenoki auyi indang bilemdir ibai tongtipang ama asenoki mebilemer. Nai ajaklen, kilung, kima aser kidang oset ajak nung aoyi angutsü akok. Auyi jagi tashi mait indang jembir. Saka ano iba yagi tashi balaka aliba indanga jembir. Tsüngremi asenok auyi nungi yanglu anungji asenok dak tashi mait alitsü akok saka Tsüngrem tsüngdang tashi tait lir. Tsüngremi auyiji agi, aser lishi yanglu aser nisung ka yanglu. Kong auyi lir idakji inyaktettsü tashi lir. Pa poteper aser asenok ajungli.

Nai ashitsü akok, "Kibuba, Nai ni auyi nungi yanglu saka inyaktettsü tashi agi sünga yanglu. Ni kü sasa tashi mait saka Ne dak tashi tait lir. Ni ata alidang, agütsüdang aser ajem ajema alidang meshitetjang aser Nai mulungba ama yanglujang." Pauli ashi, "Khrista shibai ni tashi itdaksür, pa ajanga ni ajak inyaksü akok" (Fil. 4:13). Pai ano ashi, "Saka ain tulubaji onok meyong asütsü asoshi iba rongsen onok ali po nung kar" (2Kor. 4:7).

Kong auyi lir, idakji inyaktettsü tashi lir. Kong lishi lir idakji aintsü asoshi mapang tajung lir. Ne taküm nung Pa teyangluba inyakyim nem maneni agüjang. Pai mulungba nung yanglutsü asüngdangang.

Yisu indang mangashidangba tesemtemi aotsüla: Oscar Amaechina

May 03, 2023: 2050 küm tashi nungbo alima nung Khristan nütsüing billion 3.3 junger alitsü, ta asadangtetogo, ajisüaka iba nungjagi Yisu Khrista sülen chichia anidaker Khristan kwi alitsü?, ta Africa nung amenoka aliba Afri-Mission & Evangelism Network nung Tir, Oscar Amaechina-i metetdaksü.

Interview ka nung jembidang pai, "Yisui Pa nütsüingtem dang yamai ashi, 'Kü nütsüing kümnüra pai pei sasa azüoktsüla aser pei Kangki apur Kü sülen anidaktsüla' (Mathi 16:24). Khrista tajaba nung iba ya ajanga kinü tanur aser teintet na tsüngda bendanger. Tia maka nisung aikati pei sasa azüoktsü makoker aser Khrista sülen anidaktsü atema pei Kangki mapuner. Khristan teimbakati menenpur sarasadem agiba ajanga parnok Khrista nütsüing kümogogo ta amanger," ta ashi.

tongtibangtiba teinyaksüji tamangertem Khrista tesayubatem den sendakteptsüba nung yaritsüla aser Khrista mesüka kümdaksütsüla. Tia maka Arogo aikati ibaji sendoker. Ni Khrista agizükba mapang nung shingaia kü dang 'nai nüsasa azüoktsüla aser pei Kangki aputsüla' ta mashi. Ajisüaka kü dang, nü timtem ajak samatsü, Yisu nü timtem ajak agientsütsü aser na azükarutsü, ta dang ashi. Tanü item tangatetbatem aliba ajanga Arogotem tain makümer," ta pai ashi.

"Asenoki kodang Tsüngrem den tesendaktep tasen ka yangludir ibaji ajanga asenoki Pa den tongteprateptettsü. Yisui mapa agi Pa ama alitsü asenok dang sayur. Pai asenok renemtsür aser alima dang osangtajung proktsü ayongzüker," ta Oscar-i ashi.



Oscar Amaechina

"Shi nung timtem majangshiiibo shingaia Tsüngremjunga metenzükettsü, ta Yisui meteta liasü. Pai, asenoki tarutsü tensa timtem balala indang kecha memeteti asenoki wadangi oa inyaktettsüner. Asenoki pei Kangki aputsü melungtetba ajanga tensa mejungi aliba

tesemtem nunga maneni Kangki aputettsü. Pai asenok nem tetuyuba balala jungjunga inyaktettsüner. Pai asenok dang kechi inyaksüar tuyur aser asenoki inyakba mapatem asadanger. Tsüngrem O ajanga itemji asadanger," ta pai ashi.

"Khristai asenok dang alima tesem ajakleni oa kintem Pa nütsüing kümdakjang ta tuyur (Mathi 28:19). Atangji asenoki nütsüing kümdaksür asü lokti ka dang ayongdener? Khristantemi pei sasa azüoker anogo shia pei Kangki apura mapang shia aibelentsü asü? Tamangertem kanga kümdangtsüla aser Tsüngrem O nung ang ajemdaker nütsüingsüba mapa inyaksüla. Nisunger tangatetbatem ajanga Tsüngrem O amokbangogo," ta pai ashi.

"Taküm ayongayonga jangratema linüba ajanga Khristantem chichia Khrista nütsüing mekümteter. Khristantemi tang Khristan yimsü benshibaji Kangki nung masü pei dak dang rangloker benshir. Asenoki Pa temoatsütem aginer, Pai agütsüba maongka balala aginer saka Kangki aser timtemba maginer. Iba ya tagizüktetla masü. Khristantemi pei sasa ibaji jungjunga asadangtsüla," ta pai ashi.

"Tashi mangaba dang nungibo menor asüyonga tashi angabaji tajungba," ta pai shisem.

Oscar Amaechina-i nisung shingaia sayutsüing mesüdangba mesüra Yisu indang mangashidangba tesemtemi oa osangtajung proktsüla, ta ayongzüker.

Oscar ya 'Mystery Of The Cross Revealed' kaket zülusang lir.

AO OSHI ANGAZÜKDAK:
TANÜ ANGAZÜKTSÜBA OJANG



Puma

(adj) tetsür jaksübangsü aser yimyakoya agi tebur mesük (tom boy)

* Tetsür **puma** alidak lai tebur mapa ajak inyaker.

Puna

(adj) ajak akaba (sufficiency)

* **Puna** kibong dak aika atsüngloker.

OLONG PAITEP # 6504

	1			2			3		4
5							6		
7			8						
							9		
		10							
11									12
				13					
				14					
15									

TIPIEN

- 1. Balaka
- 6. Aika shirangba
- 7. Tar tatsü
- 9. Nenu'er jabaso
- 10. Sen latettsüba
- 11. Tangar kübok alir
- 14. Lon nung inokba
- 15. Tzü ayimdak
- 16. Ajok

LANGTSÜNGLEN

- 2. Hai sür inyak
- 3. Aor tenung ka
- 4. Ali telungi talangka lur
- 5. Tebang kenyongi mazüoker
- 8. Ken atema anenzükertem
- 9. Toktepa noktak
- 10. Sen
- 11. Benjong agi
- 12. Telung nung rizünga ayu
- 13. Tebang nung enok

OLONG PAITEP # 6503 TELANGZÜBA


TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak,
- 10. Aonung, 11. Dokan,
- 13. Tinu.

Agüja aliba noksa nung meputepi aliba 20 bushiang



Tatong Tir Dhankhar-i Manipur nung shisaliok tejutem semdang



Imphal, May 3, 2023

(Agencies): India Tatong Tir Jagdeep Dhankhar-i Bodbarnü Imphal West district nung aliba university ana- Dhanamanjuri University aser Manipur University semdangogo.

Assam nung Dibrugarh University indang 21 buba Convocation Ceremony nung adenba sülen Tatong Tir Dhankhar den pa kinungsü na Imphal-i aru.

Pai Dhanamanjuri University mezüng semdang aser idakji o

jembiba den tesayurtem aser kaketshirtem den ajurutepa sensaksem.

Iba sülen Dhankhar-i Manipur University semdang aser idakji central institutions balala nungi tesayurtem aser scientists den sensaksem.

Iba sentong ajanga tekolok tejen aser lanurtem tsüngda tebilembatem lemsateptsü maongka angur ta Manipur Chief Minister N Biren Singh-i ashi.

"Linük nung lanurtem ya

rongsen lir aser asenoki lanurtem shilem agidaktsütsüla aser linük tejakleni anir aotsüla" ta paisa ashi.

Manipur Governor Anusuiya Uikey, Chief Minister N Biren Singh aser Union Minister of State for External Affairs, Rajkumar Ranjan Singh nungeri Imphal airport nung Tatong Tir Jagdeep Dhankhar pelashishia agizük.

Manipur nung Dhankhar aser pa kinungsü na nem sobaliba sempet aika agütsü.

UCC ajanga Muslim tsürtem ajangzüksü; Linük ajungalen NRC nungdaker: CM Sarma

Guwahati, May 3, 2023

(Agencies): Assam Chief Minister Himanta Biswa Sarma-i anogo ananü tashi Karnataka nung assembly election atema nübo yima jajar aser pai Uniform Civil Code (UCC) tenzükba ajanga Muslim tsürtem nem temeten agütsütsü ta ashi.

"Karnataka BJP-i kanga dang tasütait onük ka jembioago aser iba ajanga linük ajungalen UCC benoktsü atema lenmang lapoktsü. Linük ajungalen NRC nungdaker" ta Bengaluru Malleswaram nung Assam CM Sarma-i osangbener ashi.

BJP-i aniba Karnataka sorkari Muslim nunger nem 4%

reservation agienba ya otsüsütsü lemtet ka lir ta pai ashi.

Baba Saheb Ambedkar-i Drafting Committee Chairman ka ama Constitution of India yanglu aser Ambedkar-i Constitution nung religious reservations anema noktak, ta Assam CM-isa ashi.

Garo Autonomous Council tentettsü takhangba agüja lungkak ait

Goalpara, May 3, 2023

(Agencies): United Garo Autonomous Council Movement Committee President Phulins Sangma-i anir Garo nunger noklang aikati Bodbarnü Goalpara district nung sentong ka agiogo.

Parnoki tekaratiba nung Garo Autonomous Council tentettsü takhangba agüja 'We Want GAC', 'NoGAC, No

Rest' yimyimtem ayima lungkak ait.

Garo teloktemi mapang talangka nungi satellite basis nung Garo Autonomous Council tentettsü takhangba agüja arur. 2004 nungi iba takhangba agütsür ta lungkak aitertemi ashi.

Moran, Motok, Koch Rajbongshi nunger nem autonomous council agütsüiogo

süra kechiba sorkari Garo nunger nembo magütsür? Tanü onoki yimdong nung lungkak aiter aser kechisüdir süaka onok nem autonomous council agütsütsüla ta parnokisa ashi.

United Garo Autonomous Council Movement Committee-i Assam nung alir Garo nunger atema autonomous council ka mapang talangka meshia arur.



May 3, 2023 nü All Tribal Students' Union, Manipur (ATSUM)-i lungkak aitba sentong nung Churachandpur kübok Torbung tesem nung ozüng alema mapa inyakba noksa nung angur. Lungkak aitertemi tesem kar nung tyre rongdok aser Bungmual nung forest beat office ka rongdoktsü. Manipur nung Meitei/Meetei nunger Scheduled Tribe (ST) list nung adentsü ahangba anema lisapur teloktemi lungkak ait.

Myanmar nung tepuokdak alir nisung 2,000 dak tema chioktsü

Naypyidaw, Monupii/May 03 (Agencies): Buddhist yimsü amangertem asoshi tongtipang benjong, Wesak tenung nung tepuokdak alir (political prisoners) nisung 2,000 dak tema chioktsü, ta Myanmar mitkar leniri ashi.

Ozüng anema inyaksangshitsü ajungmesoba atema tepuokdak yua alir nisung 2,153 tashi "humanitarian grounds" nung chioktsü, ta Bodhbarnü Military Council Secretary Lieutenant General Aung Lin Dwe-i meyongnem agüja aliba sangdong ka nung shia liasü.

Election ajanga shimtetba Aung San Suu Kyi'er sorkar February 2021 nung mitkar tashi amshia atsüngdokba sülen Myanmar mitkar temi parnok anemertem meyrirjang aika apu aser merenshia arur.

Ozüng anema inyaksangshitsü asoshi

ajungmesoba ken o nung aija alirtem ya küm asem tashi tepuokdak ayutsü obendang agüja lir.

Tepuokdak alirtem ya kodang tashinung chioktsüar mejangja saka kinungertem Yangon nung aliba Insein Prison kimalen adenshia liasü, kong political prisoner aika yua lir. Buddha asoba anogo Wesak Day ya Brehostibarnü lir.

Mitkar temi tongtipang benjongmung nung aiben tepuokdak alir nem tatok agütsüba sangdonger.

Taoba küm par yimsü nung küm tasen tenung nung tepuokdak alir nisung 3,000 dak tema chioka liasü, saka iba mapang tepuokdak nungi chioker tem rongnung political prisoner densema aliba tejangja mashi.

Chinese Foreign Minister Qin Gang-i Myanmar semdanga mitkar lenir Min Aung Hlaing

den jembishinü kar anogo ka lir tang tesüsa tatok agütsüba ya sangdonger alitsü. Küm ana tejkadang mitkar temi yimten tashi rakzüker China nung ketdangsür temi iba linük semdangba rongnung Qin Gang ya tulutiba alitsü.

Min Aung Hlaing den senden amendang Beijing-i Myanmar den tesendaktep nung temolung agütsür, ta Qin-i ashi aser linük ana tsünga tesendaktep tali akangshitsü asoshi maneni mera agütsü molungtepa liasü, ta Chinese state-broadcaster CGTN ajanga ashi.

Tashiyim amshia sorkar atsüngdokba ajanga azüdokshiba ita ishika tsünga tamajungba akumer, kong mitkar anemer tem linük tesem balala nung tera ayanger aser mitkar temi tayimtsü amshia amakdang tanurtem densema civilian aika takum samatsüogo.

Pak nung general aser provincial election külemi agütsü molungtepogo

Islamabad, Monupii/May 3 (Agences): Pakistan sorkar aser opposition party tongtiba na kanga tongtipang sensaksem ka akaba sülen linük nung national aser provincial election külemi agütsü molungtepogo.

Mongulbar aonung menor Pakistan Democratic Movement (PDM) aser taoba ato kilonser Imran Khan-i aniba Pakistan Tehreek-e-Insaf (PTI) party tsünga sensaksemba mapang election koba anogo agütsü iba indang telemtetba ka magiteti tembang.

Pakistan Supreme Court-i taoba ita election agütsü atema anogo ka lemtettsü asoshi political party tem tsünga sensaksemtsü asoshi tetuyuba agüja liasü.

Pakistan nung yimya agi national aser provincial election külemi dang agia arur. General election ya taküm October ita agütsü lir.

Ajisüaka election tekeratiba nung agütsü atema sorkar ajungshitsü asoshi January ita PTI-i azioka aliba Punjab aser Khyber Pakhtunkhwa province legislative assemblies loksatsü atema telemtetba agiba sülen mepetmesü tenzüka liasü.

Linük temzüng özüng nung tetuyuba agüja aliba ama sorkari anogo 90 tsünga iba province ana nung election agütsüba anogo mesangdongba sülen PTI-i Supreme Court nem temepeshiba ka agütsü aser April 4 nü Supreme Court-i Punjab provincial election May 4 nü agütsü atema tetuyuba agüja liasü.

Ajisüaka sorkari linük

rongsenketzüng aser security dak sendakba nung tetsükdaktsü adoker aliba ajanga tangbo election agütsü atema tasak asütsü ta ashiba den Supreme Court-i iba amala tetuyuba ka agütsüba indang tashi ashishia liasü.

Federal Finance Minister Ishaq Dar, shiba lenisüba nung sorkar ketdangsürtem sensaksem nung shilem agia liasü, pai osangbenertem dang ashiba agi, election mapang ka nung agütsü atema telemtetba agiteba ya takok tulu ka lir.

"Ajisüaka onük tongtibangtibi election agütsüba anogo lemtettsüba lir. Telok anapronglai anogo shidangogo aser iba dak ajemdaker onoki anogo ka latettsü asoshi merangdangogo," ta pai ashi.

"Party anapronglai maneni nendaka inyaksangshitsü imlar," ta Dar-i ashi.

PTI lenir tejen Shah Mahmood Qureshi, shiba sensaksem nung dena liasü pai, election agütsüba anogo ka mulungtepa agizüksüba inyakyim tebenja lir, ta ashiba den telok anapronglai ajaki mulungba anogo ka shimtsü asoshi merangdanga liasü, ta shisem.

Qureshi-i ashiba agi, legislative assembly ka loksaba sülen anogo 90 tsünga election agütsü atema özüng yanglur aliba ya melenshitsu asoshi PTI renema lir.

Temzüng özüng nung temelenshi ka asoshi national assembly nung two-thirds majority nungdaker. Ajisüaka taoba küm Khan sorkar nungi

atsüngtokba sülen PTI-i longkak aitba temaitsü parliament inyakyim nung shilem magi-i arudar.

Qureshi-isa, sorkar den mulungtepa ajak ya tezüluba nung asütsüla aser benoka inyaksangshitsü atema Supreme Court-i sangdongtsüla, ta ashi.

Kasa mapang nung PTI lenir Fawad Chaudhry shiba sorkar den sensaksem nung densema liasü, pai Al Jazeera dang Bodhbarnü ashiba agi, par party-i national aser provincial election May 14 nü agütsü atema nongshia liasü.

"Ajisüaka parnoki anogo karara ta ashi. Parnoki assembly tem loksatsü atema mulunga aliba ama reprangtetogo, ajisüaka kodang asütsü aji mejangja. Bangzüng ka agizüksü atema onok yongya atadar," ta paisa shisem.

Maneni special assistant to Prime Minister Shehbaz Sharif, Malik Ahmad Khan-i PTI tamendakdak ashishio.

"Assembly tem yimden yimsüsüba dak ajemdaker loksara tetsükdaktsü adoktsü. General election magi tsünga ajaklen caretaker sorkar amenoka atatsüji kanga tongtibang," ta pai Al Jazeera dang ashi.

MENUNGRA BILEMTETER

(04-05-2022 - 04-05-2023)



Lt. Chubamenla Pongen
(W/o. Longrimayang
Jamir) Mangmetong

Temeim Oja,

Nai onok toktsür orr tanü küm ka ajunger, saka ne temeim mapa tajung onok mulungjang nung teti lir.

Tanü na iba akümlinung meliaka onoki na kanga menungra sarasadema amunger.

**Ne temeim Kinungbo,
Chirnurtem,
Anükapang aser
Semchirtem.**

Revolving Fund Committee (In aid of GHS Longjang Class 10 Hostel) Raffle Draw Result, drawn on 2nd May 2023

1st prize : 2889
2nd prize : 1414
3rd prize : 0682

Consolation : 1842, 2976, 2463, 1904, 0290, 1221, 0957, 1542, 1632, 1048, 0424, 1304, 1361, 2988, 1898, 0164, 2646, 2333, 1715, 0938.

N.B: Prizes are to be claimed with the original ticket within 10 days.

**Contact : 9436659863
Committee Secretary**

Office of the Longmisa Village Council RAFFLE DRAW RESULT

Draw date : 01/05/2023

1st prize : 1047
2nd prize : 0964
3rd prize : 0759

Consolation prize : 1057, 1027, 1287, 1476, 1118, 1169, 0747, 0755, 0629, 1053, 0770, 0706, 0320, 1496, 0935, 1424, 1481, 0762, 0368, 1485, 1101, 1294, 1486, 0998, 0987.

Winners may come and collect their prize with the counterpart within 15 days after the declaration of result.

**Sd/-
Chairman / 9612209049**

SANGDONGER

Ni züluba Kaket "SUPONGMAREN - The PathFinder for Godhula and E.W. Clark" nung kanga aibelena zülua lir. Anungji chapter one, page-2 nung aibelena zülua aliba teküboklen inverted comma agi mekabanga aliba orentem ya iba kaket nungi aidoker (delete). ".....which was previously occupied by a certain tribe called the Molunger. It was through a fierce battle and consequent defeat that they were driven out from the site".

Anungji iba kaket azüngertemi metongshia azüngtsü sangdonger.

(Signature)
(AKANGNUNGBA AO)
Kaket zülur

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

NO. DTE/ ESTT-2/02/2023-24

Dt. Kohima, the th May, 2023

PRESS RELEASE

It is hereby informed to all the intending candidates that the last date for submission of NSEE-2023 forms has been extended to 6th May 2023 till 4:30 pm, after which no forms will be accepted.

Further, the Department would like to clarify that the information uploaded in the Department website is official and valid. Hence, any intending candidate submitting forms for NSEE/NEET/JEE/DEE etc. based on the information obtained from other sources than the department official website will not be entertained whatsoever.

Any information relating to the Directorate to Technical Education, Nagaland, Kohima can be viewed from www.dtenagaland.org.in which is the only official website of the Department.

**(Er. VIPULHOU LHOUNGU)
Director**

Office of the Mangmetong Village Council Mokokchung - 798601: Nagaland SANGDONGER

Mangmetong Village Council ajanga telemtetba ka yamai sangdonger. Mangmetong lushi nung village council nem osang magütsü Administrators/police dak alaka tanga telok mesüra kija shingaija gari/senzüsembonger check asütsü memelar. Aibelener temzüng nung aliba ama merenshitsu.

**Sd/-
Moatemjen Imchen
Chairman**

**Sd/-
Limawati
Secretary**

PT Usha-i longkak aita aliba wrestler tem ajuru



Rajya Sabha MP aser Indian Olympic Association tir P. T Usha den wrestler Bajrang Punia aser Sangeeta Phogat nung Jantar Mantar, New Delhi nung tangokba noksa nung angur.

Monupii/May 3, 2023

(Agencies): Longkak aita aliba wrestler tem pu masemba atema lenla aika nungi aitsüba sülen IOA tir PT Usha-i Bodhbarnü parnok den longkak aita aliba tesem nung ajurutepa lai takokba tashi teyai agütsüsü ta shia liasü.

Ken o bentettsü atema Indian Olympic Association (IOA) den tongteprateptsü melena tanaben longkak ait tenzükba atema Usha-i wrestler tem aija liasü.

Lai ashiba agi, wrestler temi discipline sayutsü asü aser parnoki yimtung nung longkak aitba ajanga linük noksa raksatsüogo. Iba o jembiba sülen la aser IOA kanga mejungi aija liasü.

Lai iba olen lemsatepba ya lenla aika nungi aitsüogo aser

Olympics nung gold medal ngur aliba India nung asayar Neeraj Chopra aser Abhinav Bindra natia social media ajanga longkak aiterem pusemba lemsatepa liasü.

Bodhbarnü Usha-i osangbenertem den sensak mesemi ao, ajisüaka Bajrang Punia-i ashiba agi, lai teyari agütsüsü nangzükogo.

"Lai mezüing iba olen lemsatepba mapang onok mepelai liasü, saka lai ashiba agi, lai lemsatepba olen ya mashileni agi. Lai ashiba agi, la ya mezüingbuba nung asayar ka aser iba sülenjiang administrator ka lir," ta Bajrang-i ashi.

"Onoki la dang ochi obendang aginer ta shiogo. Onok sorkar mesüra opposition mesüra shinga dena

mangatetep mali. Onok wrestling jenjang tajungba küma yanglushitsü atema idaki amener. Iba ken o ya bentetra aser onoki aitsüba ya shidak ta kuli ngutetra temzüing ozüing kübok jenjang agitsüla," ta pai ashi.

Usha-i sorkar mesüra IOA nungi osang karbo bener arua asü ta asüngdangba mapang Punia-i, iba amala osangjibo kecha bener maru ta langzü. "Lai la onok den dena lir ta dang ashi," ta paisa shisem.

Usha den ajurutepba agi temulung asü masü ta asüngdangba mapang pai, "lai tenangzükba agütsüra ataloktsütsü ta bilemer. Ajisüaka onoki la dang ochi obendang mangu tashi onoki maneni longkak aittsü ta shiogo," ta langzü.

IPL: KL Rahul tanungba asayatem nung masayatettsü akok



Monupii/May 3, 2023

(Agencies): Lucknow Super Giants captain KL Rahul Royal Challengers Bangalore den asayaba mapang tepi yiruba sülen Indian Premier League (IPL) nung tanungba asayatem nung masayatettsü akok.

PTI-isa, pacer Jaydev Unadkat tapu kanga mejungi yirur lir aser pa-a IPL nung tanungba asayatem nung masayatettsü ta ashi.

Batter-keeper Rahul, World Test Championship final atema

renemer atadakttsü asoshi BCCI Sports Science & Medical Team atema mapang kanga petdaka asütsü ta angateter.

Faf du Plessis-i azüba ball ka boundary leni arishi aoba mapang Rahul yirua liasü. "KL tang Lucknow nung team den lir, saka pa Bodhbarnü CSK den asaya reprangba sülen Brehostibarnü camp toktsür aotsü. Pa Mumbai nung BCCI indang medical facility nung scan agitsü. Pa aser Jaydev

naprongla BCCI-i anepalutsü," ta BCCI source kati ashi.

Source-isa, tang tashi nung scan kecha agia mali ta shiogo.

"Iba amala yiruba mapang yimya agi tashiba kanga alir aser yiruba tesem awakba ya süngjemtsü atema ghonda 24 nungi 48 tashi agi aser iba sülenang scan sütettsü.

"Pa Test team nung tongtibang züngsem ka asünung pa IPL nung tanungba asayatem nung shilem magiba tajungba asütsü," ta paisa ashi.

"Scan agiba sülen BCCI medical team-i taruba jenjang agitsü atema telemtetba agitsü," ta source-i ashi.

Kasa mapang nung Unadkat-a kanga mejungi yirur lir.

"Jayden tapubo loksa mali ajisüaka pa tapu kanga mejungi lir aser pa IPL nung tanungba asayatem nung shilem magitettsü. Pa WTC final asayatsüba mapang tashi nung taneptsü ngur alitsü mali, ajia mejangja," ta pai ashi.

MPL 2023: Unity FC-i Orient FC kokogo

Kohima, Monupii/May 3 (TYO): Morning Football Club Unity Football Club-i ayongzükba G-Sports Morning Premier League (MPL) 2023 tenzükter tasembuba anogo Unity FC-i Orient FC madak takok ngua point asem ngutetogo.

Asaya nung Unity FC atema Mele-i goal pezü idaktsü aser pa den yarisema Kekhrie aser Akavi nati goal kaka idakja parnoki asaya goal 6-1 agi akok. Orient FC atema goal ka ya Zuben-i idakja liasü.

May 4 nü asaya: GethemGo vs Morung United @ 6:30PM.

BWF rankings: Satwiksairaj aser Chirag na No. 5buba nung lir

Monupii/May 3, 2023 (Agencies): Badminton Asia Championship akokba sülen India nung tepur taper asayar Satwiksairaj Rankireddy aser Chirag Shetty na BEF ranking nung maneni jenjang pongububai tuogo.

Championship tebur tarep asaya final nung Satwik aser Chirag nati Malaysia nung tarep Ong Yew Sin aser Teo Ee Yi na 16-21, 21-17, 21-19 agi koka liasü.

India nung tarepsa Dhruv Kapila aser MR Arjun na jenjang pezü tejakdangi tua tang 23buba tongtetogo.

Tebur kija asaya nung HS Prannoy maneni 9buba nung lir aser Kidambi Srikanth o Lakshya Sen nata jenjang kaka tejakdangi ta tang 22 aser 23buba nung lir. Maneni Mithun Manjunath-a jenjang pongu tejakdangi tua 41buba tongtetogo.

Tetsür kija asaya nung PV Sindhu jenjang ka asepzüka lua tang 12buba nung lir aser Tanya Hemanth tejakdangi tua 55buba nung lir.

Tetsür tarep asayar Treesa Jolly aser Gayatri Gopichand na jenjang ana tejakdangi tua tang world No. 17 kümogo.

2022 World Championships nung bronze medal ngur aliba tarep yagi küm 58 sülen tang mezngebuba Badminton Asia Championship nung goal medal ka ngutetogo. India nung asayatem rongnungi tesüsa Dinesh Khanna-i iba asayamung nung gold medal ka ngur liasü.

Satwik aser Chirag nati taoba küma December ita world number 5 tonga asayatetogo aser tawa sayaba BWF rankings nunga tena jenjang ka tejakdangi tua tang pongububa nung lir.

Badminton Asia

Messi nem PSG-i hopta ana atema tenokdangba agütsü



Monupii/May 3, 2023

(Agencies): Paris Saint Germain aser Lionel Messi na tsüingda mangatetep aliba ya maneni tuteta jembia arudar. RMC Sport sangdong ka ajanga ashiba agi, iba Ligue 1 club yagi World Cup koker aliba asayar nem ya hopta ana atema taa kecha magütsüi tenokdangba agütsüogo.

jembishinüa arudar. Iba onük ya yimjak nung kanga sensaksema arudar aser Barcelona coach Xavi densema Nou Camp nung ketdangsürtemia pa tanaben meyipa anir arutsü atema asadangdar. Xavi aser Messi na Braca nung mapang talangka asayaogo.

2022 World Cup final nung France akokba sülen Parisian fans aser Messi na tsüingda tesendaktep mejungi aküm. Küm 36 sülen taoba küm Messi-i aniba Argentina team-i World Cup koka liasü, koba par linük asoshi tasembuba WC liasü.

Club nungi temelaba magi-i tawa Saudi Arabia-i aoba atema pa nem iba tenokdangba agütsüogo.

Iba tenokdangba agütsüba sülen Argentina nung asayar ya Ligue 1 nung PSG pur Troyes aser Ajaccio den asayatsü aliba asaya nung shilem magitettsü.

Messi, shiba 2021 küm Barcelona nungi Paris-i oa liasü, pa tanaben iba Catalan club yagi meyipa aotsü atema

PSG pur tang Ligue 1 table nung temaba jenjang nung lir. Parnoki asaya 33 nung point 75 nguteta lir, ajisüaka parnok French Cup aser Champions League nungibo tsükatokogo.

BILEM DANGANG
"Temulungtetba takang melira aiben tamakok ajurutsü."